



Minggu, 13 September 2020
Ogen: Perbahanen Rasmus 16:11-15



TUTUS ERTOTO RAS ERDAHIN



Paulus ras teman-temanna meritaken Berita Si Meriah seh ku Pilipi, eme salah sada kuta i daerah si pemena i Makedoni. Paksa sie Paulus ngerana ras diberu-diberu si paksana pulung i je. Lidia, sekalak diberu si bayak dahinna ndayaken uis si meherga. Biasana si nukur uis e eme kalangen bangsawan ras masyarakat menengah. Amin pe ia sekalak perbinaga tapi litkenna rusur waktuna guna megiken kata Dibata. Banci kataken ia kalak si tutus, bas lenga iangkana itenahkenna Paulus ku rumahna lako nuruken tole kerna Kata Dibata. Talang me pusuh Lidia i bas ngaloken kata Dibata e, emaka ipindokenna ia ras kerina isi jabuna guna iperidiken. Lidia, tutus kal atena ngikutken Jesus e, emaka ipindokenna gelah Paulus ras teman-temanna kesilang i rumahna. Ketutusan Lidia e mabai kegeluhenna bagi si ngena ate Dibata. La ia ralang-alang nampati Paulus ras teman-temanna i bas pembarken Kata Dibata. Isikapkenna jabuna jadi ingan Paulus kesilang guna pekesahken, janah kedungenna rumahna me jadi Gereja si pemena i kuta Pilipi. Kerina kalak si tading i bas jabuna pe jadi si ngelai perpulungen Tuhan.

I bas kita tutus ngikutken Jesus e mbelin kel pasu-pasu Dibata man banta. Tutus ertoto ras erdahin eme dahin siilakoken Lidia bas kegeluhenna. Tuhu-tuhu kalak si tek ngikutken Jesus e tetap ipake Dibata ia bas kegeluhenna seh maka kerina isi jabuna pe ngaloken Jesus. Enda pe jadi sada persinget man banta, enggo nge kita tutus bas toto ras dahinta sedekah enda. Kinibayaken Lidia la erbanca ia nadingken Jesus e, tapi tetap ia ngendesken kegeluhenna guna ipake Dibata. Pakekenlah Kata Dibata e jadi gegeh i bas ndalani kegeluhenta. Seh maka pasu-pasuNa tetap maler man banta bagepe isi jabuta. Pindo penampatNa gelah kita tetap banci jadi pasu-pasu bas kerina pendahinta. Kalak si ngaloken Jesus e pasti isampati pendahinna.

☞ *"Tutus Ertoto ras erdahin, mbelin pasu-pasuNa banta"*